

lazz ewr weisheit wissen wie ich oft potschafft in schrift und bey meinen poten des künigs gnaden getan hab, begerund und bittund als meinen gnedigen herren, daz mir sein gnad mitsam und hülflich geruhet sein als seinen diener wider den Girziken der sich schreibet von Cunstat und seinen helfern, die da habent meinen lieben vater und ewrn getrewn diener und des haus zu Oesterreich an alle schuld untrewlich und falschlich gefangen und das hab ich sein gnaden gerawmer empietund verkundet. Und nu lieben herren und frewndt, lazz ich ew wissen daz ewr diener und mein lieber vater in derselben venkehness laider im vergeben ward und gestorben ist, und das durch denselben unordenlichen pösen und erlozen menschen den egenannten Girziken, der da in ye hat schaczten wellen umb die cron und kleynat des behemischen künigreichs und eedann mein vater anders getan hiet wenn als im vertrawt warden ist, hat er lieber sein leben in tod geben und lieben herren wissund nu soliche falsche pöse untrew, die meinem vater umb unschuld geschehen ist, traw ich ew das solichs meins vaters tods ew leid sein würdt, und derselben grossen ungerechtkait, die da der daigen behemischen cron von demselben pösen falschen und erlozen menschen Girziken geschehen ist und geschiecht, wie er untrewlich und poslich ingefallen ist in die Pragstet und dasselbist sich in die küniglich ambt underwunden hat und die anders verkert hat dann es von seliger gedechtnuss kaiser Sigmunden und kunig Albrechten und herren, meinen gnedigen herren gesezt und geordent worden ist und ander ding daselbist handlund und treibund, daz in nicht angepurdt, wenn er des der pose und erloz mensch nicht wirdig ist. Auch frumer lewt hab ungerechtielich und pöslich mit gewalt nemund, und die andern geben hat und gibt und vil ander ding zu schaden der heiligen kristenheit und dem ganzten reich und des künigs gnaden und sunderlich zu grossen schaden und schaden dem daigen ganzten künigreich aufbracht hat, das da langsam aufzuschreiben war, als ewr frewntschafft das alles nicht verpargen ist, die alle nu obgemelten ding der vorgeschriben pöz und falsch und erloz Girzik getan hat vnd tut wider die ganz gerechtikeit vnd wider recht und freyhait des Behemlands und wider alle ordenlichen berednussen, die mit des künigs gnaden und mit dem hei-